

Sujet:

Yych ♥ Gei-AIR

Vor Joore simmAIR als in d FAIRie
No KreetA gflooge und AlgAIRie.
Au z Poortugaal isch s scheen gsii.
Emool simmAIR z Atheen gsii.
MAIR hänn e Hufte LändAIR bsuecht
Und immAIR bi dAIR SwissAIR buecht.
Das isch doch kummlig, hämmAIR gfunde,
will alli Lyt am Booden unde
am Fluugi mit em wysse Gryz
grad seen: die kemmen us dAIR Schwyz.
So simmAIR als in hälle Schaare
Im Auti uff dAIR Fluugplatz gfaare,
hänn Kaffi drungge, ganz gediige,
und sinn dAIRnoo in FliegAIR gstiige.
DAIR Staart isch koo mit Grach und
Gstangg,
denn simmAIR gflooge, gottsaidangg!
MAIR hänn au z ässe griegt und z dringge,
hesch nur em Frölain miese wingge.
Me gniesst dAIR Fluug, isch
unbeschwärt,
bis bletzlig dAIR Pilot AIRgläart,
är mies go tangge, also lande,
Das hämmAIR alli guet vAIRstande.
Kuum in dAIR Luft, scho isch s vAIRbyy,
d Physik, die funggt halt immAIR dryy.
Vo dAIRt hämmAIR e Gsetz ussgraabe:
Was uff e goot, mues widAIR aabe.
Das dunggt is alli zimlig loogisch,
au wenn no zletschtamänd e Froog isch:
Wenn mAIRggt dAIR letscht
VAIRwaltigsroot,
dass s widAIR obenaabe goot?

VAIRwaltigslyt die kenne nyt,
die nämme, was am Boode lyt,
und woon e AIRline nit rentiert,
wiird si aifach anekdiert.
AasfrässAIR sinn si, ooni Gwisse,
wär s AIRlig maint, dä isch dAIR Bschisse.
Uff jeedAIR Hochzyt wänn si danze
Und fillen iire digge Ranze.
AIRscht wenn si nyt me kenne griege,
denn mAIRgge si: y kaa nimm fliege,
dAIR Buuch isch z digg, y biin e Mogge,
jetz blyyb y uff em Boode hogge.
UndAIR dAIR VAIRwaltigshoorde

**Isch us dAIR SwissAIR d Gei-AIR woorde.
Vollgrässe und zem Fliege z schwach
Macht si jetz e Hufte Grach.**

**Wottsches emool duu sälbAIR fliege?
Due dä Zeedel ummebiege,
leeg en zämme in dAIR Mitti,
giib dAIR e bitz Mie, y bitt di,
jetz no zwaimool yyne litz,
s git e scheene Fluugispitz.
Heeb een, ooni Zyt z vAIRsuume,
zwischen ZaigfingAIR und Duume,
und denn wiird im hooche Booge
vo hindAIRe no fiire zooge.
Jetz muesch en numme loosloo,
denn fliegt AIR bis uff Oslo.**

